

हे माय गाँव

हे माय गाँगा

डॉ. आभा पूर्वे



ISBN : ९७८.८१.६८७१०३.५.२

प्रथम संस्करण

ई. २०२५

सर्वाधिकार ©

कवयित्रीधीन

प्रकाशक

अंगिका संसद

सराय, भागलपुर

(बिहार)-८१२ ००२

E-mail : angikasansad@gmail.com

हरियाणा कार्यालय

वार्ड-३३, सेक्टर-२८

सरस्वती विहार, गुरुग्राम-१२२००२

चित्र

सोशल मीडिया एवं magichour.ai से साभार

रेखांकन

नागेश

मुद्रक

Das Printer

गोविंदपुरी, दिल्ली।

मूल्य

१२५.०० (एक सौ पच्चीस रुपये)

He Maay Gaang
By Dr. Abha Purvey

Rs. 125/-

माय
जीवनलता पूर्व
लेली

जे अभियो हमरों स्मृति में होने बसली होली छै
जना भारत भूमि पर गाँग माय!

—आभा

दू शब्द

‘हे माय गाँग’ के मूल रूप आबें प्रकाशित होय रहलौ छै। एकरौ हिन्दी रूप ‘नमामि गंगे’ पहले छपी गेलै। बात ई छेलै कि तखनी परम आदरणीय जसवंत सिंह विरदी हिन्दुस्तान के नदी पर कोय किताब लिखी रहलौ छेलै आरो हमरा कहलै छेलै कि गंगा पर हिन्दी में कविता भेजै लें।

हम्मैं तखनी यहा करलियै कि एकरौ हिन्दी रूप प्रकाशित करवाय देलियै। पता नै हुनकोँ ऊ किताब निकललै की नै।

जे हुएँ आबें ‘हे माय गाँग’ के मूल रूप आपना सिनी के सामना में छै। नै कुछ जोड़लें छियै, नै हटैले छियै!


सम्पर्क : शरतचंद पथ,
मशाकचक, भागलपुर-१ (बिहार)
मो.-०६३३४२०७६६८


—आभा पूर्व

क्रम—:

- उद्भव कथा/९
- विपथगामिनी गाँव/२१
- यात्रा कथा/३१
- प्राणधारा गाँव/४५
- मिलन कथा/८१

उद्भव कथा





हे माय गाँग
धरती पर उतरै सँ पहलें
कहाँ रहै छेलौ तोहें?
कोनी लोकों में?

केन्हों होतै ऊ लोक
कर्तै लोकों के ऊ लोक
तभिये तें समैलों होतै
तोरों एत्तें-एत्तें जलराशि!

विश्वासे कहाँ होय छै कि
तोरों वास
भगवान विष्णु रों बायां अँगुठा में होय छेल्हैं
आरो वहीं सँ निकली गेलों छेल्हौ
हरहरैली
बदहवासनी-रँ
जे देखी कें
थरथरी लगी गेलों छेलै
तीनो लोकों के देवतासिनी कें
प्रार्थना में जुड़ी गेलों छेलै हुनकों हाथ कि
पहाड़े नै टूटी पड़ै


धरतीये नै धँसी जाय—
जुड़ी गेलों छेलै देवता सिनी के हाथ
पितामह ब्रह्मा जी रों आगू।

हौ किसिम के कँपकँपी देखी कें
भौआय गेलों छेलै परमपिता ब्रह्मा
समेटी लेलें छेलै अपनों कमंडलु में तोरा,
हे माय गांग!

नै, है केना हुँ सकै छेलै कि
तोरोँ ई जलराशि
कोय कमंडलु में समाय गेलों होतै
आरो यहू केना हुँ पारें
कि
तोरोँ हरहरैतें वेग
शिव जी के जटाए में बँधी रहें।

मन केन्हौं कें नै मानै छै
मतर पुराण तें कहै छै
आरो सौंसे लोकमानसो
मानै छै





तैं हम्मी कैन्हें कहौं
कि तोहें
धरती पर आवै सें पहलें
भगवान विष्णु के
गोड़वाला बायां अँगुठा में वास नै करै छेलौ,
बुद्धां तोरा
अपनों कमंडलु में
नै रखी लेलें छेलै
आरो फेनु यहू कैन्हें कहौं कि
तोरो सनसनैलों वेग
शिवजी के जटा में
बँधी के नै रही गेलों छेलै!


मतरकि हम्मैं
शायत ई बुझौव्वल सें
बच्चै लेली
अपनों मनो के समझाय लै छी
गोमुख रों शिलाखंडे
भगवान विष्णु रों बायां अँगुठा छेकै
गोमुखे
ब्रह्मा रों कमंडलु छेकै

आरो हिमालय रों
ऊँचो-ऊँचो बिखरलों फैललों चोटी
शिव के जटा सें
कम्पो कहाँ बुझावै छै।

हमरो ई बात जो सच्चो हुवें
तें हे माय
मनें ई मानवे नै करै कि तोहें
विष्णु रों बायां अँगूठा में
वास नै करै छेल्हौ
आरो वहाँ सें सीधे
ब्रह्मा रों कमंडलु में;
फेनु देवाधिदेव
शिव रों जटा पर नै उतरलौ!

हेने ही होलों होतै, माय
हे पतितपावनी
मोक्षदायिनी
त्रिभुवन विहारनी
त्रिपथगामिनी
महानदी हे गाँग माय!






सूर्य रों किरण सें दीप्त
पर्वत रों चोटी सें
तरल चंद्रमणि नाँखी उतरतें,
हे गंगा माय
जों तोहें नै ऐतियौ धरती पर
तबें की होतियै सगर रों
साठ हजार पूत सिनी के
जे तोरों जौल छुवेला भर सें
जित्तों होय गेलों छेलै।

साठ हजार हौ पुत्र सिनी
आरो सगर के हौ विजय यज्ञ
देवता सिनी पर विजय पावै रों यज्ञ
यही सें तें
यज्ञ में भाँगटों डालै लेली
चुराय लेलें छेलै इन्द्रें
यज्ञ रों घोड़ा
आरो बान्ही देलें छेलै ओकरा
पाताल लोकों में जाय कें
एकटा तपस्यारत रिखि रों कुटिया के बाहर।

सगर के पूतसिनी नें
 खोजवों शुरू करलकै
 तें पहुँचलै पाताल लोक
 यज्ञ रों घोड़ा देखलकै
 रिखि आश्रम रों बाहर बँधलों
 सोचलकै, ई सब
 यहा रिखि के खेल छेकै
 की-की नै कही देलकै
 सगर रों सब पूतों नें—
 अपमानित होतें रिखि रों गुस्सा
 कहाँ रुकें पारलै केना रुकतियै
 हाथों में जौल लेलकै
 आरो सगर के साठो हजार पूतों कें
 शाप दइये तें देलकै।

लहकी उठलै सब्भे पूत सिनी
 भष्म रों ढेर बनी गेलै पूत सिनी
 पृथ्वी लोक पर खलबली मची उठलै
 हाहाकार रों प्रलय
 सगर रों भस्मीभूत पूत
 प्रेत बनी कें भटकें लगलै।





आखिर सगर के ही पूत अंशुमाल ने
ऊ सिनी के मुक्ति लेली
कोशिश करलकै
मतुर सब निष्फले गेलै।

तबें दिलीप रों संकल्प जगलै
मतुर वहू संकल्प गेलै व्यर्थ
अभागलौ !

बढ़ले जाय छेलै
हाहाकार रों प्रलय कुछ आरो
आखिर उठी ठाढ़ो भेलै भगीरथ
(दिलीप रों दोसरी प्रिया के पूत)
उठाय कें हाथ अपनों
संकल्प में एतन्है कहलकै—
हम्में अपनों पूर्वज के मुक्ति लें
धरती पर उतारवै
मुक्तिदायिनी गंगा कें।


भटकी रहलौ आत्मा सिनी कें
पतितपावनी गाँग

मुक्ति देतै
आरो फेनु
उतरी ऐलै गाँग
शिव रों जटा सें होतें हुएँ
नीचें भरतभूमि पर।
हे माय गांग
तोरों जन्म के
कत्ते-कत्ते कथा प्रचलित छैं
तोरों जत्ते धारा
ओत्ते तोरों जन्मोकथा।

कहै के तें
यहू कहलौं जाय छै कि
हजारो-हजार वर्ष पहलें
जबें हिमालय
अपनों उथल-पुथल के दौर में छेलै
तबें वहाँ एक ठो नदी छेलै
जेकरों नाम छेलै इन्द्रब्रह्म!

चट्टान ऊपर होलै
तें इन्द्रब्रह्म के धाराओ बँधी गेलै






नदी झील बनी गेलै
मतर नदी केँ रोके पारलें छै कौने
नदी के अर्थ होय छै—प्रवाह
झील बनलौं इन्द्रब्रह्म नें
फेनु किनारा तोड़लकै
आरो वही
तीन धारा में फूटी पड़लै
जे धारा पच्छिम में बहलै
ऊ होलै सिंधु
जे धारा पूरब दिस बहलै
ऊ कहलै ब्रह्मपुत्र
आरो जे धारा
दक्षिण दिस बहलै
वही होलै गाँग ।
गाँग, जे विन्ध्य पर्वतमाला सें
रोकला पर
पूर्व गामिनी बनी गेलै
आरो अपनौ धारा केँ समेटतें
बंगाल रौ जमीन केँ
आंदोलित करतें
सागर में

तब्बै सें समाय रहलौ छै
युग-युग सें ही
बहलौ आवी रहलौ छै गाँग!



विपथगामिनी गाँग





हे माय गाँग
लोगें तोरा त्रिपथगामिनी कहै छौं
यही इन्द्रब्रह्म रों तीन धारा के कारणें
आकि कोय आरो कारणें ।
हमरों रिखि-मुनि तें यहा कहै छै कि
तोरों एक धार स्वर्गो दिस गेलों छै
दोसरों धरती कें स्वर्ग बनावै छै
आरो तेसरों पाताल लोकों में प्रवेश करी
वहाँकरों प्राणी कें मुक्ति दै छै
अधोगाँग बनी कें ।

माय,
तोरों जन्मकथाहे
लोक कें कल्याण करैवाली छैकै
जगत कें मुक्ति दैवाली छैकै ।


हे माय गाँग
तोहें तें जगतजननी छैकी
जगततारणियो
फेनु हेनो कैनहें हुएँ छै कि
तोरों छलछल-कलकल करतें लहर सिनी

हठासिये
प्रलय के नेतों दिये लागे छै
आरो फेनु चारो दिस
नाश रों तांडव
शुरू होय जाय छै?

पहाड़ रेत बनतें नजर आवै छै
गाछ, जना झरतें पत्ता नाँखी गिरै छै
धारा सें ढहते मकान
जना कुआँ में गिरतें पत्ता सिनी
आरो उफनैलों धारा
आसन बनाय लै छै
सेतु सिनी केँ
राजपथ केँ
पगडंडी केँ ।

सब्बे कुछ समावें लागै छै
तोरों कोखी में
आरो जबें
उतरै छौं क्रोध
हुवै छौं मन शांत





तबे कहाँ कुलुवो होय छै,
हुवै छैं तें बस
पहाड़ों के माथा पर
धरती के छाती पर
ओकरो बॉही पर
गोड़ों पर
खाली आदमी के लाशे-लाश—
कंकाल रों साम्राज्य ।


माय! तोरों ई उन्माद
कालो कें भयभीत करैवाला छेकै
डरो कें डोर दैवाला ।

तोरों ई उन्माद सें
काँपतें रहै छै धरती
देवता रों गिरै छै घोर
आरो एतन्है नै
बही जाय छै तोरा में
देवताहौ निरुपाय
भाँगटों के उड़तें रहै छै बाज-गिद्ध
यैठां-वैठां, सब्भे जग्घों पर ।

एकठो दिल दहलायवाला कानवों
एक भयानक चीख
फेनु वहा घनघोर सन्नाटा
आरो सब्भे के बीच
हे माय, तोरों वेग काँपतें रहै छै
गुस्सा सैं
आकि करुणा में
कौनें कहें पारें!

जना, समाधिस्थ योगी रों साँस
आग के लपट में
बदली जाय
जेना, चंदन रों शीतलता में
लपट के लहर समाय जाय
जेना, इंजोरिया रात
बैशाख-जेठ के लू बरसावें लगें
जेना, अमृत सैं
हलाहल के ज्वार उठें लगें
हेने ही होय जाय छैं तोरों रूप
जबें तोहें उग्र हुवै छै






उन्मादिनी होय छौ ।
हे माय,
काल रों कंधा पर सवार होलें
हाँफतें-हाँफैलें भागली जाय छौ
एकटा हरियैलों-भरियैलों दुनियाँ कें
मुर्दघट्टी में बदली जाय छै
हजारो-हजार सालो वास्तें
छोड़ी जाय छौ
अपनों पीछू
काँपतें हवा
कानतें दिशा
कलपतें पहाड़
बिलखतें जंगल
आरो पछाड़ खैतें नदी ।

माय गाँग
जबें तोंय होय छौ उन्मादिनी विपथगामिनी
तबें लोक संस्कृति के नाश होय छै
नीति के गर्दन दबैलों जाय छै
प्रकृति के मर्यादा टूटै छै ।

आय सैं हजारो हजार साल
 जबें तोहें बड़ी शांत छेलौ
 कहै छै
 अजोधा के राजा जितशत्रु के
 पुत्र छेलै सगर
 जिनकों ही पूत छेलै जहु कुमार
 वही जहु
 अपनों सगा संबंधी रों साथ
 कैलाश पर घूमै लें गेलों छेलै
 फेनु कैलाश के सुरक्षा लेली
 ओकरो चारो दिस
 खाई खोदी देलकै
 आरो उतारी देलकै वैमें गाँग कें
 धरती कें फोड़ी
 अपने दंड रतन सैं ।
 फेनु की छेलै
 तोरों जौल
 धरती रों नीचें
 नागलोक तांय पहुँची गेलै
 नागों के दिल दहलै
 आरो होने ही नागराज रों गुस्साहौ
 रोकलकै सगर के पूतसिनी कें





मतर कभियो कि रुकैवाला छेलै
अभिमानी सगरपुत्र!

फेनु की छेलै
नागराज ठाढ़ों भेलै
शाप दै वास्तें,
तबें की
देखथैं-देखथैं
सगरपूत सिनी भष्म होय गेलै
शाप दैके पहले ही।
जानलकै सब्भे बात जबें
राजा सगर नें
कलपित्तो मनो सें भेजलकै पोता भगीरथ कें
आदेश देलकै
जेना कें हुएँ
गाँग कें सागर तांय आनी
गाँग के धारा शांत करों।
भागीरथ नें तोरो लहर कें
शांत करलकै।
तब्हें सें हे माय गांग
भागीरथी कहावै छों


आरो तोहें जाह्वीयो छेकी
कैन्हेंकि जहुएं तोरा धरती पर
उतारलें छेलौं, दोबारा ।

हे माय गाँग
कर्ते-कर्ते कथा छौं तोरो
धरती पर उतरी आवै के
मतरकि यहू सच छेकै कि
तोरा जबें-जबें भी
सगर के पूत सिनी नें
छेड़लें छै, फोड़लें छै
तोहें विकट रूप धरलें छौ
आरो बहें लगलौं छौ उन्मादिनी बनी—
धरती डुबलौं छै
तोरो आनलौं जलप्रलय में
हे माय गाँग!



यात्रा कथा





हे माय गाँग
की तोहें खाली महानद्दीये भर छेकी
आकि सच्चे में माय्ये छेकी?
हम्में तें एतन्हें जानै छी कि
तोहें हिमालय रों बड़की बेटी छेकी
भीष्म पितामह रों माय छेकी
भगवान शिव रों भार्या छेकी।


हों, माय गाँग
खाली नदिये नै छेकै
माय छेकै
महादेवी छेकै
कहीं तें दू भुजा में
कहीं तें चार भुजा में सुशोभित।

माय
भारत कें निर्मल
पुनीत बनाय खातिरे तें
तोहें नदी के रूप
धरी लेलें छौ
हों, नदिये रूपों में निकलै छों

उत्तराखंड रों गोमुख से
 साढ़े बारह हजार से
 बेसीये ऊँच्चों
 पर्वतभूमि से
 आरो फेनु लगातारे
 बहथैं रहै छौ
 ढाई हजार किलोमीटरो
 से बेसी
 यात्रा तय करै छौ
 आपनों साथ
 कै-कै नद्दी सिनी केँ
 साथ लेनें
 आरो तब तांय ही
 बहतें ही रहै छौ
 जब तांय कि
 तोरों वेगवान धारा
 बंगाल रों समुद्र के साथ
 एक नै होय जाय ।

माय गाँग
 केकरा नै आचरज होतै





ई जानी कें कि
जैठां सें तोहें निकलै छौ
वै ठां तोरों गहराई
बस पन्द्रह इंच सें बेसी कहाँ छौं!
आरो एत्तें पतला कि
मुश्किल सें दू गज के लगै छौ
ऊ तें तोरों काया
तभैं कुछ चौड़ा हुऐ छौं
जबें कनखल में
तोरों दू धारा
मंदाकिनी आरो अलकनंदा
पहाड़ों सें नीचें उतरै छै
तभिये तोहें भागीरथी कहावै छौ
तबें तोरों रूप
कर्ते निर्मल होय छौं
कर्ते स्वच्छ
फेनैलों दूधों कें
लजाय देवाला ।


हे माय गाँग
की छौं तोरों जौल में

कि पापो तांय
पुण्य में बदली जाय छै
पंडित सिनी बोलै छै
तोरों जल में
बैव वैक्टरियो फेज नाम के
कोय विषाणु होय छै
जे दूसरो आरो खतरनाक विषाणु के
निगली जाय छै ।

हमरा तें नै मालूम
हमरा तें खाली
एतन्है मालूम छै कि
तोरों जौल
जौल नै
धरती पर बहलौ
अमृत रों धार छेकै
जे हमेशे बहलैं रहै छै
हरिद्वार सें लैकें
गंगासागर तांय ।

माय
तोहें हेनों-तेन्हों नदी नै
देवनदी छेकौ





यहीं सैं तैं
तोहें जन्ने-जन्ने सैं गुजरलौ छौ
हुन्नै-हुन्नै देवता सिनी रौ घोर
देवता सिनी रौ नगर
ठाढ़ौ होय गेलौ छै।

माय गाँग
तोहें देखलें छौ
अपनौ किनारी-किनारी पर
बसतैं ढेरे-ढेर सभ्यता कें
ढेरे-ढेर साम्राज्य कें
ऊ सब बनथैं भर नै देखलें छौ
ऊ सब कें उजड़थौ देखलें छौ
तोहें धर्म रौ उठानो देखलें छौ
धर्म में ऐतें पाखंडो कें
आरो ऊ पाखंड रौ विरोध में
गोस्सा रौ उठतें बोलियो कें।

कभियो तोरे किनारी
स्वामी दयानंद नैं
धर्म रौ पाखंड रौ विरोध में


आपनों धजा लहरैलें छेलै
तोरो लहर में
है विरोध रों गूँज
अभियो होनै के गूँजी रहलौ छै ।

माय गाँग
तोरो निर्मल लहर
खाली लहरे भर नै
ई इतिहासो छेकै
भारतीय सभ्यता आरो संस्कृति रों ।

कोइयो ई लहरो में
सुनें सकै छै
हस्तिनापुर रों कथा
जे तोरे तटों पर
कभियो बसलौ होलौ छेलै ।

कौरव-पांडवो के
कर्त्ते-कर्त्ते कथा
तोरो लहरो सें
अइयो सुनलौ जावें पारें,





तोरा में जमुना रों मिलवों
दू हैरैलों बहिन के मिलवों लगै छै ।


कर्त्ते-कर्त्ते राजवंश रों कथा
तोरों धाराहै के साथें
बहर्ते रहै छै
वैमें मौखरी राजाऔ सिनी के
कहानियो छै ।
गुप्तेवंश के नै
नंदवंश
मौर्यवंश
आरो पालो वंश के
उत्थान-पतनों के
तोरों तटें
तोरों लहरें देखनें छै ।

हे माय गाँग
जैठां तोरा सें जमुना मिलै छै
ऊ सचमुच में कर्त्ते पवित्र स्थल छेकै
तभिये तें ऊ प्रयाग छेकै
जहाँ भगवान रामें

कभियो भारद्वाज रिखि सें उपदेश सुनलें रहै
 आरो जहाँ कभियो
 सम्राट हर्षवर्द्धन
 हर पाँच साल बाद
 अपनों संपत्ति रों दान
 प्रजा के बीच
 खुल्ला हाथों सें करलें करै
 तबें यज्ञ सें उठतें पवित्र धुआँ
 सौंसे भारत के
 सुगंधित करतें रहै
 हजारो हाथी-घोड़ा के गरज साथें
 भक्त सिनी रों जयजयकार!
 ई सब के कथा
 खाली इतिहासे में
 नै लिखलें होलें छै।
 हवाओ पर/माँटियो पर
 लहरो पर/आकाशो पर
 लिखलें होलें छै।

माय गाँग
 हिमालय सें उतरला के बाद






जबे तोहें काशी पहुँचौ छौ
आरो अर्द्ध चंद्रमा रौ रूप
धारण करै छौ
तबें तोरौ रूप रौ सुन्दरता के
वर्णन महाकवियो सैं संभव नै।

काशी कें तोहें
कर्तें पवित्र बनाय देलें छौ
कर्तें-कर्तें महान यज्ञ के
यहाँ होतें हुए
तोरो लहरें देखलें छौ
एकरे प्रमाण देतें
यहाँ दशाश्वमेध घाटो छै—
तोरो महिमा कें
खाली दशाश्वमेघ घाटे नै कहै छै
हरिश्चंद्र घाट
भाड़वाला घाट
जलशायी घाट
मणिकर्णिका घाटो
अपनों-अपनों हृदय में
इतिहास रौ मुनलों पन्ना समेटलें होलौ छै,

जिनका जानकारी छै
 हुनी पढ़ै छै
 आरो भारतवासी होय के गौरव
 अनुभव करै छै
 जहाँ स्वर्ग रों नदी गाँग बनी कें उतरलौं छौं ।
 गाँग, जे कुंभ मेलाहौं कें पवित्र करै छै
 गांग, जेकरौं बिना कुंभ मेला
 बिना आत्मा के देहे-रैं तें ।

आरो यहीं गाँग
 जबें मगध में आवै छै
 तबें एकरौं लहर के चंचलता
 आरो बढ़ी जाय छै
 चंद्रगुप्त मौर्य के
 शूरता कें याद करी
 भिक्षु सम्राट अशोक कें याद करी
 महात्मा बुद्ध रों स्मृति सें—
 तबें यहा गंगा रों लहर
 साहित्य रों वाणी बनी जाय छै ।
 मगध रों गंगा में
 अश्वघोष
 महाकवि भास





वाणभट्ट आरो चाणक्य रों वाणी
सुतते-जागते रहै छै।

यहीं आवी कें गाँग
अपनों देह कें फैलावें लगै छै
सोन नदी कें गल्ला लगाय कें
आगू बढ़ी जाय छै
अंग प्रदेश रों पवित्र भूमि दिस।
माय गाँग
तोरा अंग देश एते प्रिय कैन्हें छों
ई हमरा मालूम छै
हमरै कैन्हें
सौंसे भारते के मालूम छै
कि
अंग देश
अंग महाजनपद
अंग प्रदेश
तोरो नैहरो छेकौं
यहीं तोरो
दोसरो जन्म होलो छेल्हें
जबे अंग रों रिखि जन्मु नें


अँजुरी में राखी
तोरा उदर में रखी लेलें छेल्लहीं
तबें भगीरथ के याचना पर
हुनी अपनों जाँघ सें तोरा
बाहर निकाली देलें रहें
यहें कारण तोरों नामो तभिये सें
जाह्नवीयो होय गेलौं ।

हे माय जाह्नवी
अंग प्रदेश में एक्के दाफी नै
दुए दाफी नै
तीन-तीन दाफी उत्तरवाहिनी बनै छों ।



प्राणधारा गाँव






के छलै
सौंसे जंबू द्वीप में
देवदत्ता सें बड़ी कें अपरूप रूपजीवा?
उर्वशी, रंभाओ ईर्ष्या करै
देवदत्ता रों रूप सें
वही देवदत्ता
कभियो पाटलिपुत्र के
गाँग के काता पर
गंगा रों लहर पर
अपनों छवि के निहारते रहै
घंटो-घंटो बैठी कें ।

देवदत्ताहै कैन्हें
कोशा
आरो ओकरो बेटा उपकोशाहौ
जे अपनों अपूर्व खूबसूरती
अपूर्व यौवन
अपूर्व धन-संपत्ति लेली
सौंसे जंबू द्वीप में
विख्यात रहै ।

तोरोँ काता पर
जबेँ विहार करतेँ होतै
तबेँ सौँसे पाटलिपुत्रहै
पुष्पपुर बनी जैतै होतै ।

कोशा
जेकरोँ बारे में ई कथा
जगतप्रसिद्ध छै कि
जबेँ
सिंहगुहावासी रों मुनि
ओकरोँ लुग पहुँचलोँ छेलै
ई बतावै लें कि
अप्सरा
सुन्दरी सिनी के रूप रों जादू
विरागी केँ की बाँधे पारें !
मतर हौ तपस्वी केँ
है कहाँ मालूम छेलै
कि कोशा
धरती रों उर्वशी छेकै
बस कोशा केँ
देखै भर के देर छेलै





आरो
सिंहगुहावासी
कोशा के रूप
जाल में फँसी केँ
ओकरोँ दासे तें बनी गेलों छेलै ।


माय गाँग
हे माय गाँग
हम्में तोरोँ लहरे सें
सुनलें छियै
पायल-कंगनाहै के नै
तलवार के झनकारो तांय
जे तोरोँ लहर में गूँजे छै ।

हे माय गाँग
तोरोँ रेतों सें
तोरोँ लहर सें
तोरा छूवी केँ ऐतें
वेगवती हवा सें
तोरोँ जंगल सें
हम्में एगो कथा सुनलें छियै

कहानी गुरु गोविन्द सिंह रों
जे पाटलिपुत्र में
प्रकट होलों छेलै,
जेना तोहें
स्वर्ग कें छोड़ी
अनचोके धरती पर
प्रकट होय गेलों छेलौ
धरती रों पूतसिनी के दुःख
हरै लेली
छिनमान होन्हे
तोरों फैलौ आँचल के
एक पवित्र कोरी पर
प्रकट होलों छेलै
गुरु गोविन्द सिंह ।

हिन्दु धर्म के रक्षा लेली
जिन्हीं अपनों चार-चार पूत
तेजी देलकै
मतर अपनों संकल्प सें
पीछू नै हटलै
देश रों पूरब-पच्छिम





दक्खिन-उत्तर तांय गेलै
धर्म के रक्षा लेली
महाजनपद मगध सँ लैके
महाजनपद अंगप्रदेश तांय ।

हे माय गाँग
तोरो लहर
गुरु गोविन्द सिंह रों यशोगाथा
तेज-तेज सुरों में
गैतें बहतें रहै छै
अंग प्रदेश रों मणिहारी काता तांय ।

हे पतितपावनी
तोरो महिमा रों गाथा
मगध सँ लैकें अंग तांय
ओतै विराट छौं
जत्तें कि अंग प्रदेश में
तोरो काता रों विस्तार ।


तोहें कै-कै नदी कें समेटतें
मोकामा तांय की पहुँचै छौं

तोरा में अंग प्रदेश रों महिमा
दूध-पानी नाँखी
एक हुवें लगै छै।

मोकामा
यानी मगध-अंग रों
मिलन-स्थल
यानी मगध-अंग रों सीमा-रेखा
मोकामा रों सम्मुख
गंगा रों बायाँ भाग में
अंग प्रदेश रों सिमरिया घाट
जहाँ कातिक महीना में
महान धार्मिक मेला लगै छै
सिमरिया रों ई कातिक मेला
अंग प्रदेश रों कुंभ मेलाहे तें छिकै।

यही सिमरिया गाँव में
ओज रों कवि दिनकर के
जन्म होलौ छेलै
जिन्हीं तोरों धाराहे नाँखी
अपनों कविता कें





आग आरो चंदन से सजैलें छेले
लगै छै—
हे गाँग माय
तोहीं दिनकर जी के कविता में
समाय गेलों छों ।


मगध आरो अंग के
भूमि के
हरियाली से भरैवाली हे माय गाँग
तोहें मोकामा से आगू की बढ़ै छों
तोरा में कै-कै नदी के
अपना में समेटते
आखिर क्यूँ नदी
तोरा में समाय जाय छै ।

कभियो हेनो समय छेलै
जबे कैएक नदी रों पानी
मोकामा के झील में
इकट्ठा हुऐ
आरो वहीं से एक बड़की नदी बनी
गंगा में समाय जाय

जे मगध-अंग रों सीमा कें
अलग करै
जहाँ मगधराज बिम्बसार
के समय में
मगध-अंग रों सेना बीच
भीषण युद्ध होलों छेलै
आरो पराजय के कारणे
अंग राज्य के आखरी राजां
महानदी में कूदी
जाने दै देलें छेलै—
यहू कथा
तोरो लहर पर
अभियो तांय दर्ज छै।

हे माय गाँग
तोरा सब्भे कुछ याद होथीं
तोहें यहू नै भूलें पारलें होभौ
कि पालवंश रों आखरी राजा
इन्द्रद्युम्न रों पटरानी
अपनों पुष्करणी के बीच
स्वर्ण कमलों पर नहाय छेलै





आरो एक दिन हेनो होलै कि
नहाहिये वत्ती
स्थिर रहै वाला
स्वर्ण कमल रों पंखुड़ी सिनी हिलें लगलै
असगुन होय के शंका भेलै
आरो सचमुचे में शंका सच होलै
इन्द्रधुम्न पटरानी साथें
अपनों राजे छोड़ी देलकै
यहू कथा
क्यूल नदी के जलधारा के साथे साथ
तोरो लहर में
समैतें रहै छै
तब तांय
जब तांय कि क्यूलो नदी
चलते-चलते
थकलों-हारलों
सूर्यगढ़ा आवी कें
तोरा में समाय नै जाय छै।


गाँग
ई नाम लेथें

सौंसे देह
श्वेत शिलाखंड नाँखी चमकी उठै छै
आरो रोम-रोम
तुलसी मंजरी नाँखी
सुगंधित होय उठै छै
एक अजीब पवित्रता लेलें ।

मौन
आरती पर रखलौं
अकंपित दीया रँ
रौशनी दिऐं लगै छै
कामना रौ अन्हार
नै जानौं कहाँ
कबें छोड़ी दै छै काया
आरो शेष बची जाय छै
कपूर के सुगंध सें सनलौं
कोय अलौकिक प्रकाश ।

गाँग
धरती पर बहतेँ अमृत छेकै
आदमी रौ मुक्ति छेकै





स्वर्ग रों दीप्ति छेकै
भारत रों रूप छेकै
जाड़ा रों धूप छेकै
भारतवासी रों माय छेकै।
गंगा रों अर्थ
कोय व्याकरण में नै
कोय शब्दकोश में नै
ऊ जे वहाँ अर्थ छै
ऊ कोय नदी रों छेकै
माय गाँग रों नै।

गाँग तें
समाधि में
जागैवाली शक्ति छेकै
रिखि के दिव्य शक्ति छेकै—
ई हम्मी नै
अंगप्रदेश रों रोम-रोम बोलै छै।


धन्य छै ई अंग भूमि
जहाँ गाँग
एक दाफी नै

दू दाफी नै
तीन-तीन दाफी
उत्तरवाहिनी होय के बहै छै।

हे माय गाँग
पहलें तें तोहें
सूर्यगढ़ा में दुकथें
उत्तरवाहिनी होय छौ
आरो मुंगेर तांय
उत्तरवाहिनीये बनलौ रहै छौ
फेनु अजगैबीधाम में आवी
कुच्छु दूर वास्तें
आरो फेनु
कहलगाँव सें कोशी संगम तांय
उत्तरवाहिनीये बनलौ रहै छौ।

धन्य छै
ई अंग भूमि
कर्ते सौभाग्य
बाँटी रहलौ छौ तोहें यहाँ
ई बात खाली हम्पी नै






सबभे अंगवासीये नै
तोरा में अपनों धारा समाय के
डकरा नालाहौ बोली रहलौ छै।

हे पतितपावनी
आखिर तोहें
मुद्रल रिखि रों धाम तांय
ऐतें-ऐतें
एतें हँसमुख कैन्हें होय उठै छों
कोन ठो याद
तोरा एतें गुदगुदावें लागै छों?
यही लें कि
यहाँ मुंगेर के
बीचोबीच बहै छों
आकि
तोरा याद आवी जाय छों
जबें मुंगेर
चंपकतीर्थ कहैलौ जाय छेलै
आकि ई याद करी कि
पुरानों समय में तोरों ऊ पार सें
एकटा घन्नो जंगल शुरू होय छेलै

जे नेपाल रों सीमा तांय जाय छेलै
आरो जहाँ तांय
ई जंगल जाय छेलै
वहाँ तांय
अंग महाजनपद रों सीमा छेलै
जेकरै पुरानों समय में
चम्पकारण्य भी लोगें बोलै छेलै।

हे मोक्षदायिनी
तोहें कष्टहरणी तांय पहुँची कें
आखिर की
देर-देर तांय सोचतें रहै छौ
की वनवास के क्रम में
आगू पीछू चलतें राम, लखन, सीता कें
याद करतें रहै छौ
आकि पालवंश रों वैभवे कें याद करै छौ
जेकरो याद दिलावै छै
तोरो काता में बनलों
मुंगेर रों अद्भुत गुप्त गढ़
जेकरो दीवारी में
कोठरी सिनी में





जाने कत्तें तें युगों रों कहानी सिनी
हँसतें-खेलतें
आरो कपसतें मिलै छै।
तोरो काता में ठाढ़ों
ई गुप्त गढ़
अपनों अतीत के बारे में
तोरा सें बोलतें रहै छै।

माय
हम्मैं तोरो
कष्टहरणी घाटे पर बैठी कें
सुनलें छियै
हौ तांत्रिक रों कहानी
जे अपना कें
खौलतें घी के कढ़ाय में
फेकी दै छेलै
आरो यै किसिम सें
भगवती कें खुश करी
सवा मॉन सोना
हासिल करी लै!

आखिर की करै छेलै
 एत्तै-एत्तै सोना
 कोन दुखिया रों बीच
 बाँटी आवै सोना—
 कोय नै जानै
 मतुर एत्तै तें
 सब्भैं जानै छै कि
 तोरों काता में ठाढ़ों
 यही गुप्त गढ़ पर
 कभियो राजा धर्मपाल रों पुत्र
 देवपाल रों धजा
 लहरावै छेलै
 जौनें अपनों विजयोत्सव पर
 तोरों एक काता सें
 दोसरो काता तांय
 नौका सिनी रों सेतु बनवाय देलें रहै,
 तबें तोरों लहर
 नाव पर लहरैतें
 रौशनी सें
 सोना रों उठतें तरंग बनी गेलों छेलै!






माय गाँग
तोहें पालवंश के
गौरवे के की नै देखलें छौ
देखलें छौ तोहें
शेरशाह के बढ़तें पराक्रमों के
सुनतें रहलौ छौ
मीरकासिम के कहानियो के
तोरा सें बेसी
आरो के जानै छै?
तोरो काता में बनलौ
मुंगेर रों ई गढ़
कर्ते-कर्ते इतिहास के
तोरा सें कहतें रहै छौ
मुगल शासकों रों कहानी—
नारा आरो हुँकार रों कथा।

आरो ई कहानी सिनी के
समेटते हुए
गुनगुनैतें होलें
चल्लौ आवै छै तोरो लहर
अंगप्रदेश रों गंगाधाम में

जहाँ तोहें
एक दाफी फेनु
उत्तरवाहिनी बनी जाय छों
तोरोँ यहा गति रों कारणें
गंगाधाम
कलशतीर्थ के नामों सें
लोगों में जानलों जाय छै ।

माय गाँग
तोहें यहाँ आवी कें
कर्ते हँसमुखिया
कर्ते शांत
कर्ते गंभीर
कर्ते भव्य
कर्ते विराट
दिखै छौ—
शायत यही लें कि
ई गंगाधाम
शिव रों तपोभूमि रहलों छै
यहीं पर महर्षि अगस्त्य के
तपस्या सें






प्रसन्न होय कें
हुनका दर्शन देलें छेलै
कि यहीं
सोम नें
शिव जी रों घोर तपस्या करी
शिव कें
प्रसन्न करी लेलें छेलै
आरो वहा प्रसन्नता में
महादेव शिवें
सोम कें
अपनों सिर पर
रखी लेलें छेलै—
ई गंगाधाम
तभिये सें
काशी नाँखी
पवित्र होय रहलौ छै।

माय गाँग
कभियो-कभियो हम्में सोचै छियै कि
आखिर
एकरो नाम गंगाधान कैन्हें पड़लै?

शायत यही लें कि
 तोरों दोसरों जन्म
 यही भूमि पर होलों छेल्हैं
 गिरि पर तपस्यारत
 जह्नु रिखि के आश्रम
 जबें तोरों धार में
 बहें लगलों छेलै
 तखनी रिखि नें
 तोरा चुरू में लैकें
 पीवी लेलें छेल्हैं
 ई देखी
 बेकल भगीरथें
 कर्तें अनुनय करलें छेलै
 तभिये तोरा जह्नु रिखि नें
 मुक्त करलें छेल्हैं
 तहियें ते तोहें
 जाह्नवी कहलैला—
 यानी जह्नु रिखि रें पुत्री!

माय गाँग
 ई गंगाधाम





तोरो नैहर छेकौं
तोरो दोसरो जन्म के भूमि
तभिये तें ई गंगाधाम छेकै ।

की कारण छेकै कि
जबे तोहें
यैठां सें निकलै छौ
तोरो चेहरा पर
कभियो कोय
उदासी नै दिखै
तोहें कोय विराट महाकाव्य नाँखी
महाभारत नाँखी
रामचरित मानस नाँखी
हमेशे बहतें रहै छौ
चंपा सें लैकें
गंगा सागर तांय ।


सिमरिया सें लै केँ
राजमहल रौ विशाल क्षेत्र
तोरो मायके ही तें छेकौं ।
हे गाँग माय

यहाँ तोरों हँसी
तोरों उल्लास
देखथैं बने छै ।

माय गाँग
तोहें अंग देश के
अंग महाजनपद के
अंग प्रदेश के
एत्ते कुछ देलें छौ कि
सौंसे सरंग केँ
सौंसे धरती केँ
जों कागज बनाय देलौ जाय
आरो सातो समन्दर केँ स्याही
तभियो
अंग प्रदेश में फैललौ
तोरों महिमा केँ
नै लिखलौ जावें पारें !

हे माय गाँग
तोहीं तैं
अंगवासी केँ






ऊ विशाल जलमार्ग देलें छेलौ
जेकरै पर चली कें
अंगवासी
बहुत दूर देशों तांय गेलै
आरो बसैलकै
वहाँ एक लब्बों अंग देश—
'अंगकोर'
वहाँ-वहाँ बसी गेलै चंपा
ताकि
चंपा रों कहानी कें
दूर-दूर देशो में फैलैलों जावें पारें ।

अंग प्रदेश रों चंपा में
तोरों
ओतै कहानी
लहरावै छै
जत्तै कहानी
अंग प्रदेश में
तोरों लहर पर बिछलों होलों छै ।

कभियो गंगाधामे में

तोरों घाटो कें पार करी
 भगवान बुद्ध
 अंगुत्तराप पहुँचलौ छेलै
 कै दाफी तें ऐलौ छेलै
 भगवान बुद्ध
 चंपा में—
 जौन चंपा में
 गंगाधाम रों बाद
 तहूँ तें उतरै छौ, माय
 अपनों सौंसे आभा कें
 बिखेरतें होलें !
 कहै छौ कथा
 सोणदंड रों
 चंपा रों अद्वितीय वेदाभ्यासी
 जे अपनों शिष्य सिनी के साथ
 बुद्ध रों वाणी सें
 अभिभूत होय कें
 बौद्ध होय गेलौ छेलै ।
 कहै छौ कथा
 वासुपूज्य रों
 हुनकों जन्म सें लै कें





निर्वाण तांय रों कथा...
कहै छों कथा
सम्राट अशोक रों माय
शुभद्रांगी के
जे चंपाहे रों बेटी छेली
कहै छों कथा
विशाखा रों
जे भगवान बुद्ध रों
पहली शिष्या छेली।


हे गाँग माय
चंपाहै में आवी कें
तोहें विस्तार सें कहै छौ
चंदनवाला रों कथा
जे भगवान महावीर रों
पहलों शिष्या छेली
आरो फेनु कहै छौ
महासती बिहुला रों कथा
जें अपनो पतिये के नै
जीवन लै आनलें रहै
बलुक ई सिद्धो करलें छेलै

कि जनानी चाहे तें
सब्भे संकटों के
मुकाबला करी
अपनों अस्तित्व के
रक्षा करें पारें।

तोरोँ एक-एक लहर
कहै छै कथा
महासती बिहुला रों
विषहरी रों जिद के
चाँदो सौदागर के भक्ति के
ओकरोँ समृद्धि के।

माय गाँग
तोरे तें पुण्य केँ पावी
कभियो यही चंपा
बड़ों-बड़ों जहाजों के
शरणस्थली बनलों रहलै
वही सिनी जहाज सेँ
उतरै छेलै
सोना, मोती, माणिक—





चमकै छेलै चंपा
सूरजों रों आभा नाँखी
एकेक सौदागरों रों
द्वार पर
खड़ा रहै सौ-सौ बैलगाड़ी
सोना के मोहर सें भरलों ।


धने नै बरसै छेलै
संस्कृतियो बरसै छेलै
संगीतो बरसै छेलै
चंपा रों वासवदत्ता रों कहानी
राग-रागनी नाँखी
अंग प्रदेश रों घरे-घर में
अभियो घुमतेँ-फिरतेँ रहै छै ।

दुनियाँ
सब्बे बात जानै-न-जानै
राजा रोमपाद रों कथा तें
जानवे करै छै
हुनके तें दामाद छेलात महर्षि ऋषिशृंग
अवध के महाराज दशरथ लेली

करनें छेलात यज्ञ
आरो अवध नरेश दशरथ रों ऐंगनों में
गूँजलों छेलै किलकारी
राम रों
लखन रों
शत्रुघ्न रों
भरत रों ।

ऋषिशृंग
तोरे तें लहरों पर
चढ़ी कें ऐलों छेलै
चंपा में
जिनकों पिता विभांडक
अंगे देश रों ऋषि छेलात
आरो तोरे ही तटों पर
जिनकों आश्रमो रहै ।
चंपा में आवी कें
कर्त्ते-कर्त्ते कहानी कहै छौ
हे माय गाँग
आरो आखिरी में सुनावै छों
महादानी







परमवीर
कर्ण रों कथा
महाभारत रों सूर्यपुत्र के कथा
जे तोरे लहरों में धसी
सूर्योपासना में लीन रहें छेलै
सवा मौन सोना दानो करै
तोरों तटों पर ठाढ़ों होय कें
अइयो
तोरों तटों पर ठाढ़ों
कर्णगढ़
एकेक कहानी कें कहै छै ।

अतीत औघड़ नाँखी
जगतें रहै छै
चंपा रों गंगा के किनारी-किनारी ।

हे माय गाँग
तोरों चंपा में
शौर्य आरो दाने के कथा
नै दौड़ै छै
यहाँ तोरों काता-काता पर

वैराग्यों रों
 कर्त्ते-कर्त्ते कथा
 छितरैलों होलों छै
 हीरा-मणि के पत्थल नाँखी ।
 तोरों काता-काता में
 बिखरलों होलों छौं
 होन्हे प्रेम रों गाथाओ
 तोरों नगीच ऐथैं
 अभया रों कथा
 जगें लगै छै
 जे रानी तैं छेलै
 कोय नरेश दधिवाहन रों
 मतुर जेकरा
 प्रेम होय गेलों छेलै
 चम्पाहै रों
 एकठो सेठ महासुदर्शन सें
 राजा के खबर मिललै
 आदेश होलै
 सुदर्शन के सिर
 ओकरो धड़ सें
 अलग करी देलों जाय





आरो जबें जल्लाद
हेनों करै लें ऐलै
तें ओकरो तलवार
फूल के माला में बदली गेलै
सुदर्शन रों प्रेम बची गेलै ।

चंपा केरी हे गाँग
हम्मैं तोराहै सें सुनलें छियै
बारी-बारी
बिहुला
विशाखा
चंदनवाला
सुभद्रांगी
अभया
आरो रानी घग्घरा रों कहानी ।


ई तें सब्भैं जानै छै
कि तोरो किनारा पर बसैवाला
सेठ-द्वारपाल लुग
अठारह करोड़ स्वर्णमुद्रा
आरो दस करोड़ गाय छेलै ।

शायत केकरहौ विश्वास नै होतै
हुवै केना सकै छै?
मतर हेन्हे छेलौं तोरों चंपा ।

तोहें अपनों
सबटा प्रेम दै रखलें छेलौ एकरा
तभिये तें
अपार धन-संपत्ति रों साथ
तोरों किनारा पर
ज्ञान रों महासरस्वती बहै छेलै ।

कहलगाँव
विक्रमशिला बौद्धमहाविहार रों खंडहर
अइयो
अतीत रों ज्ञान के परंपरा कें
खुल्लों कंठ सें बोली रहलौ छै
कि तोरों काता-काता में
दीपंकर श्रीज्ञान
सरहपाद
शबरपा
चंपपा





चेलूकपा
रों वाणी गूँजलों छेलै
जेना कि
कुप्पा घाट रों किनारी-किनारी पर
महर्षि मेंही रों वाणी
तोरो रेत आरो लहर पर
सातो सुर में बजतें रहै छै।

हे गाँग माय
सच्चे में
अति पुनीत छै ई अंग प्रदेश
जहाँ पवित्र मोक्षदायिनी
महानदी गाँग में
महानदी कोशी
मिलै छै
आरो तखनी समुन्दरे नाँखी
फैली जाय छों तोहें
कहलगाँव में
फेनु तें फैलतें जाय छों
अंग प्रदेश रों
आखरी छोर तांय


राजमहल के कहानी सुनावै लें
जे भारतेन्दुओ रों जन्मभूमि छेकै
बिहार-बंगाल रों किस्मत के कहानी
बादशाह रों भाग्य-दुर्भाग्य छेकै।

मतर ई सब बातों सें बेसी
तोहें ई कहानियो कें
दुहरावै छों कि
केना कें
तोरो किनारा पर
शची ने घोर तपस्या करलें रहै
आरो आखिर में
स्वामी रूपों में पैलें छेलै
देवता रों राजा इन्द्र कें।



मिलन कथा







हे माय गाँग
अंग प्रदेश से निकलथें
तोरो धारा
दू भागों में
बंटी जाय छौं
जेना तोहें
अपनों दू बाहू केँ
आगू फैलाय देलें रहौ
केकरा सेँ गल्लों मिलै लें
केकरा सेँ गल्लों लिपटी
अपनों सबटा खुशी
अपनों सबटा दुःख
सौंपी दै लें ।

हों, पच्छिम बंगाल रों मुर्शिदाबाद
मुर्शिदाबाद के
नदिया गाँव
यही तें ऊ जग्घो छेकै
जैठां सेँ तोहें बटी जाय छौं
दू भागों में
आरो जगत में

प्रसिद्ध होय जाय छों
 केकरो लें पद्मा
 केकरो लें भागीरथी
 मतर की अंतर पड़ै छै
 कोय कोइयो नामों सें तोरा पुकारें
 तोहें छों तें सब्भे लें
 पतितपावनी गंगाहे
 मोक्षदायिनी गंगाहे
 पापविनाशिनी गंगाहे
 जगततारिणी गंगाहे—
 चाहें तोरों धार
 बंगलादेश रों भूमिये के
 कैन्हे नी पवित्र करें
 आकि फेनु बंगाल रों चैतन्यभूमिये कें ।

की फर्क पड़ै छै
 कि हुगली तांय ऐतें-ऐतें
 तोहें हुगली नदिये
 बनी जाय छों
 मतर तोरों धारा में
 लहर में






जॉन भगीरथ रों कथा
लिखलौं होलौं छै
हौ शेषे कहाँ होय छै!
तोहें आखिर तांय
भागीरथिये बनली रहै छों ।
ई कहानी
आयको तें नै छेकै
आय सें तीन-चार करोड़ सालों सें
पहिलकों कथा छेकै
जबें हिमालय नें
अपनों आकार लेलें छेलै
आरो तोहें उतरी गेली छेला
हौ हिमालय सें ही
भारत रों पुण्य भूमि पर
आरो तभिये सें
बहले जाय रहली छों
बिना रुकले
अविरल गति सें ।

हे माय भागीरथी
हावड़ा होतें हुएँ

जबें तोंय
सुंदरवन में
विश्राम लै लें पहुँचै छौं
तबें महासागर
कर्तें स्नेह सें
तोरो दिस देखतें रहै छौं।

सुंदरवन तांय ऐतें-ऐतें
कर्तें-कर्तें वनस्पति
खुशी सें
पुलकित होतें रहै छै
तोरो विजय रों कथा
वही सुंदरवन में
गरजी-गरजी कें कहै छै
शक्ति रों अनगिनती सूर्य नाँखी शेर।
कभियो यही शेर
राजमहल के वनों में
दहाड़ै छेलै
जबें सागर
बंगाल रों सुंदरवन के नगीच नै
राजमहल के नगीचे होय छेलै







आरो अंग देश रों मंदार
सागर के बीचों में
शिवलिंगे नाँखी
शोभै छेलै ।

सदी-पर-सदी बितलों गेलै
काल बितलै
माय गाँग
तोरोँ साथ ऐलों
पर्वत रों रेत
नदी रों मिट्टी
जमतेँ गेलै
आरो समुद्र एक दिन
सुंदरवन तांय पहुँची गेलै
जहाँ अभियो
मिट्टी जमी रहलौ छै
आरो समुन्दर
दूर होते जाय रहलौ छै
डेल्टा के उपरैतेँ भूमि के
कारणें
तोरोँ धार

वैठां कत्तें मंद पड़ी जाय छै
 की
 यहाँ तांय ऐतें-ऐतें
 सचमुचे
 थकी जाय छौ तांय
 मतुर सागर सें
 मिलै रों चाह के
 कहाँ रोकें पारै छै
 डेल्टा रों उठतें भूमि!
 तोहें अपना के
 ई धारा में नै
 कै-कै धारा में
 बदली लै छौ
 यहाँ
 तोरा
 एतें-एतें धारा में
 विभाजित देखी के
 हमरा यही लगै छै कि
 हौ सब्भे नदी
 महानदी सब—
 यमुना






रामगंगा
करजली
सोम
गंडक
कोशी
बाँसलोई
मयूराक्षी
चानन
जे सब तोरा में मिली कें
एक होय गेलों छेलै
यहाँ तांय ऐतें-ऐतें
तोरा सें अलग होय रहलौ रहें
शायत ई बतावै लेली
गाँग रों शक्तिये पावी कें
हम्में सागर रों
किनारी तक पहुँचें पारलें छी
नै तें, नै जानौं
कहाँ
कोंन पहाड़ों नें
कोंन रेगिस्तान नें
कोंन जंगल नें

हमरा सोखी लेलें होतिथै ।

हे गांग माय
एत्ते-एत्ते धारा रों साथ
तोहें यहाँ
हेने लगै छों
जेना देवी भगवती रों
कै-कै हाथ
एक्के साथ
हवा से लहराय उठलें रहें ।

हे माय गाँग
तोहें भगवती ही तें छेकी
तोहें खाली
धरती पर
स्वर्ग रों महानदिये
नै छेकी—
तोहें जीवनदायिनी छेकी
तोरे कारण तें
नगर-महानगर रों
सीना पर






कंधा पर
बाँही पर
हथेली पर
सजलों होलों छै तीर्थप्रदेश
महापर्व रों उत्सव ।

मतर आयकल देखै छियै कुछ आरो
की कारण छेकै कि
तोरोँ चेहरा पर
बरखा रों पनसोखा नै
बरखा रों
भय दैवाली
बिजली कड़कतेँ रहै छै—
कहीं यैलेँ तें नै
कि तोरोँ
कंचन काया पर कोय
महुँरैलों पानी रों तेजाब
छिड़की रहलों छौं!
वहूँ कि
एक-दू मौन नै
लगभग तीन करोड़ लीटर प्रदूषित पानी—

वहू में रोजानाहै।

लोगों कें नै मालूम कि
है अपराध के
जे दंड होतै
वैसैं तें कोइयो किसिम
बचना मुश्किल/हम्मैं रहौं कि तोहें
एको मछली के बचना मुश्किल
कोय लब्बों सृष्टि लेली
एकेक करी कें मरी रहलौं छै
मछली रों सब्भे प्रजाति
घड़ियाल मरी रहलौं छै
डॉलफिनो के प्राण बेकल छै
मतर ई आदमी छेकै कि
चेतने नै छै।
हिमालय पर
बारूद रों ज्वालामुखी
फूटी रहलौं छै
बर्फ रों पहाड़ पिघली रहलौं छै
कल यहू पारें कि
हिमनदियो सूखी जाय





तबें तोहें कहाँ होभौ धरती पर
हे माय गाँग
कहीं हेनो नै होय जाय कि
तोहीं रूठी केँ
फेनु लौटी जा स्वर्गलोक
आरो भरत भूमि रों पूत
शोकसंतप्त सगर नाँखी
विलाप करतें दिखें ।

नै, हम्में जीवित होलों सगर रों पुत्रसिनी केँ
मरै लें नै देवै
जुलाई बीस सौ चौदह रों संकल्प केँ
कोय रावण हरै—
हरै लें नै देवै
तोहें भगीरथे के नै
भारतवर्ष रों सवा करोड़ सें ऊपर
भारतवासी रों माय छेकी ।





आभा पूर्व : एक संक्षिप्त परिचय

- जन्म तिथि : २३ अक्टूबर १९६४ ई.
जन्म स्थान : भागलपुर
माता का नाम : जीवनलता पूर्व
पिता का नाम : रूद्रदत्त पूर्व
शिक्षा : एम.ए.(गोल्ड मेडल), पी-एचडी
प्रकाशन : देश भर की विभिन्न पत्र-पत्रिकाओं में रचनाएँ प्रकाशित
संकलनों में रचनाएँ : चम्पा फूलै डारे डार, आधुनिक अंगिका काव्य कोश,
हे दशरथ के राम आदि दर्जनाधिक संकलनों में
रचनाएँ प्रकाशित
सम्पादन : 'नया हस्तक्षेप' (अनियमितकालीन पत्रिका) के अलावा
१. गीत-गंगा (अंगिका गीत-संग्रह), २. नवगीतकार
मधुसूदन साहा, ३. अर्द्धनारीश्वर (हिन्दी कहानियों का
पंजाबी अनुवाद), ४. जीवनलता पूर्व : शांत नदी की
अनंत यात्रा (अंग महिला साहित्यकार संसद,
भागलपुर), ५. अंगिका लोकगीत, ६. अंगिका
लोकसाहित्य : एक अध्ययन (अंगिका संसद,
भागलपुर), ७. केकरोँ चाँद केन्होँ चाँद (अंगिका
संसद, भागलपुर), ८. खोई हुई लड़की का खत
(अंगिका संसद, भागलपुर), ९. डॉ. अमरेन्द्रः व्यक्तित्व

और वागर्थ (कामायनी, भागलपुर), १०. डॉ. अमरेन्द्र : संदर्भ और साहित्य (समीक्षा प्रकाशन, दिल्ली)

प्रकाशित पुस्तकें : १. अंतहीन वैतरणी (अंगिका उपन्यास), २. गुलबिया (अंगिका उपन्यास), ३. कुँवर विजयमल (हिन्दी उपन्यास), ४. चन्दन जल न जाए (कहानी-संग्रह), ५. शरीष की सुधा (कहानी-संग्रह), ६. जब-जब झरे शृंगार (दोहा-संग्रह), ७. गुलमोहर का गाँव (कविता-संग्रह), ८. नागफनी के फूल (गजल-संग्रह), ९. शिशिर की धूप (कविता-संग्रह), १०. नमामि गंगे (कविता-संग्रह), ११. ताँका शतक, १२. मंदोदरी (अंगिका प्रबंध काव्य), १३. अंगिका व्याकरण आरो रचना-कला (सहलेखन), १४. ऋतुरंजन (कविता-संग्रह), १५. कर्ण महाकाव्य का सौन्दर्य-सौष्ठव, १६. आकाशगंगा (हायकू-संग्रह) १७. हे माय गाँग (अंगिका कविता-संग्रह), १८. काव्यशास्त्र (सहलेखन),

सम्पर्क : शरतचंद पथ, मशाकचक, भागलपुर (बिहार)